



**JUDICIAL SYSTEM MONITORING PROGRAMME**  
**PROGRAMA DE MONITORIZAÇÃO DO SISTEMA JUDICIAL**

## *Sumáriu Kazu*

Periode : Marsu 2012  
Edisaun : 30 Marsu 2012

### **Sumáriu prosesu julgamentu kazu iha Tribunál Distritál Baucau segundu no terseiru semana fulan Marsu 2012**

#### *Intrudusaun*

Iha segundu no terseiru semana fulan Marsu 2012 JSMP kontinua hala'ó atividade monitorizasaun ba prosesu julgamentu kazu iha Tribunál Distritál Baucau. Atividade ne'e hahu husi loron 12 -15 Marsu 2012 no kontinua fali iha loron 19 -22 fulan Marsu 2012.

Durante periódu semana rua ne'e JSMP konsegue rejista kazu hamutuk 15 (sanulu resin lima). Kazu hirak ne'e kompostu husi kazu abuzu seksuál 2, ofensa ba integridade fízika simples 3, violénsia doméstika 6 (kazu 5 klasifika nu'udar ofensa ba integridade fízika simples no 1 seluk nu'udar maus tratus ba konjuje), krime omísidiu agravadu 1, omísidiu negligente 1 no tentativa omísidiu 2.

Entre kazu 15 ne'e kazu 6 mak hetan adiamentu husi tribunál ou la konsege hala'ó prosesu julgamentu tanbá parte intresadu sira la kumpri notifikasaun no tanbá la konsege priense kompozisaun juizes kolektivu. Mesmu nune'é iha 4 mak hetan ona desizaun husi tribunál no restu sei kontinua prosesu hanesan normál.

Husi kazu 4 ne'ebé hetan ona desizaun hot-hotu hetan deit pena suspensaun husi fulan 6 to'o tinan 3 prizaun, inklui kazu ne'ebé involve maus tratus ba konjuje.

Hanesan ho edisaun sira seluk, sumáriu ida ne'e ho objetivu atu kontinua habelar no atualiza informasaun konabá lala'ók husi prosesu julgamentu iha tribunál sira hotu, partikularmente iha Jurisdisaun Tribunál Distritál Baucau.

Tuir mai deskripsaun sumáriu julgamentu kazu kompletu:

#### **1. Kazu krime abuzu seksuál, Nú. 117/Crm.C/2011/TDB**

Tuir agenda Tribunál Distritál Baucau iha loron 12 Marsu 2012, sei hala'ó prosesu julgamentu ba kazu krime abuzu seksuál ne'ebé rejista ho númeru prosesu 117/Crm.C/2012/TDB. Arguidu ba kazu ne'e ho inisiál JM hasoru vítima ho inisiál MF. Kazu ne'e akontese iha loron 13 Abril 2011, iha Aldeia Mulia, Suku Uaitame, Sub-Distritu Quelecai, Distritu Baucau.

Mesmu iha ona agenda, maibé prosesu julgamentu ba kazu ne'e la konsege realiza tanbá arguidu ne'ebé notifikadu la marka prezensa iha tribunál. Nune'é tribunál liu husi juiza Dra. Ângela Faria Belo adia julgamentu ba iha loron 23 Abril 2012 tuku 14: 30 lorokraik.

## **2. Kazu krime ofensa ba integridade fízika simples, Nú. 13/Crm.S/2010/TDB**

Iha loron 13 Marsu 2012, Tribunál Distritál Baucau halo tentativa konsiliaun ba kazu krime ofensa ba integridade fízika simples ne'ebé resjita ho númeru prosesu 13/Crm.S/2010/TDB. Arguidu ba kazu ida ne'e involve ema nain tolu: ida-idak ho naran: Cosme de Jesus, António Coelho no Alito Coelho, hasoru vítima Mariano Menezes. Kazu ne'e akontese iha loron 03 Novembru 2008, iha Aldeia Ossomali, Suku Uani Uma, Sub-Distritu Uatucarbau, Distritu Viqueque.

Prosesu tentativa konsiliaun ba kazu refere prezide husi juiz singulár Dr. António Fonseca, Ministériu Públiku representa husi Dr. Pascasio de Rosa Alves no arguidu sira hetan defeza husi Dr. Gregorio de Lima husi eskritóriu Defensória Públiku.

Iha prosesu tentativa konsiliaun ne'e vítima husu ba arguidu sira atu indemniza vítima ho karau ida, nune'é vítima bele dada fali nia kazu hodi rezolve tuir sira nia kultura. Depois rona tiha pedidu husi vítima, parte arguidu sira konkorda no pronto atu fo karau ida nu'udar simbolu ida hodi kura fali vítima nia moras tanbá entre sira sei iha relasaun família.

Bázeia ba prosesu ne'e, ikus tribunál omologa kazu refere.

## **3. Kazu krime ofensa ba integridade fízika simples Nú. 22/Crm.S/2012/TDB**

Tuir mai iha loron 13 Marsu 2012 Tribunál Distritál Baucau hala'ó julgamentu ba kazu krime ofensa ba integridade fízika simples ho natureza violénsia doméstika. Kazu ne'e rejista ho númeru prosesu 22/Crm.S/2012/TDB no involve husi arguidu ho inisiál CdA hasoru nia kónjuje ho inisiál AS. Kazu ne'e akontese iha loron 03 Feveireiru 2011, iha Aldeia Hukalele, Suku Luca, Sub-Distritu Viqueque, Distritu Viqueque.

Prosesu julgamentu ba kazu ne'e prezide husi juiz singulár Dr. Afonso Carmona, Ministériu Públiku representa husi Dr. Pascasio de Rosa Alves no arguidu hetan defeza husi Dr. Gregorio de Lima husi eskritóriu Defensória Públika.

Audiénsia julgamentu hahú ho lee akuzasaun husi Ministériu Públiku. Iha akuzasaun haktuir katak, iha loron 03 Feveireiru 2011, maiz ou menus tuku 23:00 kalan, arguidu halo ofensa ka agresaun fízika ba vítima ho maneira tuku iha tilun hun parte loos dala rua, tuku ihaibun dala ida

to'o vítima monu ba rai. Wainhira vítima monu ba rai arguidu kaer vítima niaulun tuku ba ahi matan, arguidu kontinua kaer vítima nia liman rasta ba liur, no hodi bidon matan baku vítima nia isin lolon, akompañá insulta vítima ho liafuan aat ka tratamentu aat ba vítima.

Asaun ne'e rezulta vítima sofre bubu iha tilun hun parte loos, bubu iha ulun no kanek iha ain sorin parte karuk. Tanbá ne'e vítima tenke ba halo tratamentu iha Centru Saude Viqueque. Kazu ne'e akontese tanbá vítima baku sira nia oan.

Relasiona ho akontesimentu ne'e, Ministériu Públiku akuza arguidu ho artigu: 145 Kódigu Penál konjugadu ho Lei Kontra Violénsia Doméstika artigu: 2 alinea: 2 letra b.

Iha julgamentu ne'e arguidu haktuir katak nia komete hahalok ne'e tanbá vítima la tein hahan ba labarik sira (oan), no baku labarik sirak wainhira labarik sira husu hahan. Mesmu nune'é arguidu arepende nia hahalok no deklarata katak nia sei la halo tan iha futuru.

Iha parte seluk, vítima deklarata katak arguidu halo duni aktus hanesan hakerek iha akuzasaun. Vítima mós haktuir tan katak hahalok ne'e arguidu komete bebeik ona maibé iha kazu ida ne'e vítima la bele pasiensia ona nune'é vítima ba keixa iha polísia.

Depoizde rona tiha deklarasaun husi parte sira, tama ba iha alegasaun finál. Iha Ministériu Públiku nia alegasaun finál nia husu ba tribunál atu aplika pena multa ba arguidu. Entertantu parte defeza husu ba tribunál atu absolve arguidu husi kazu refere tanbá nia arepende ninia hahalok, responsabiliza ba oan nain 3 no promete katak sei la halo tan hahalok refere iha futuru.

Leitura de sentensa hala'ó iha lora 28 Marsu 2012.

#### **4. Kazu krime ofensa ba integridade fízika simples Nú. 15/Crm.S/2012/TDB**

Tuir agenda Tribunál Distritál Baucau iha lora 13 Marsu 2012, atu hala'ó julgamentu ba kazu krime ofensa ba integridade fízika simples ho natureza violénsia doméstika ne'ebé rejista ho número prosesu 15/Crm.S/2012/TDB. Kazu ne'e involve arguidu ho inisiál RJP hasoru vítima ho inisiál DdC. Kazu ne'e akontese iha lora 19 Janeiru 2011, iha Aldeia Boleha, Suku Soba, Sub-Distritu Laga, Distritu Baucau.

Maibé prosesu julgamentu ba kazu ida ne'e la konsege hala'ó tanbá parte interesadu (arguidu, vítima no testamuña) sira la kumpri notifikasaun hodi marka prezensa iha tribunál. Tuir informasaun ne'ebé JSMP hetan husi ofisial justisa katak, julgamentu ba kazu ida ne'e adia fali ba lora 02 Maiu 2012.

#### **5. Kazu krime omisídiu agravadu Nú. 07/Crm.C/2012/TDB**

Tuir agenda Tribunál Distritál Baucau iha lora 14 Marsu 2012, hala'ó julgamentu ba kazu krime omisídiu agravadu ne'ebé rejista ho número prosesu 07/Crm.C/2012/TDB. Arguidu ba kazu ida ne'e hamutuk ema nain tolu ho inisiál AMS ho nia kolega nain rua seluk hasoru vítima

ho inisiál AM. Kazu ne'e akontese iha loron 22 Setembru 2011, iha Sub-Distritu Laclubar, Distritu Manatuto.

Maibé prosesu julgamentu ba kazu ne'e la konsege realiza tanbá arguidu la notifikadu tanbá paradeiru la klaru. Aliénde ne'e arguidu no testamuña ne'ebé notifikadu la marka prezensa iha tribunál.

Tanbá ne'e, juiz titular ba kazu refere, Dr. António Fonseca decide atu fali adia julgamentu ba iha loron 09 Maiu 2012, tuku 10:00 dadersan.

#### **6. Kazu krime ofensa ba integridade fízika simples Nú. 157/Crm.S/2011/TDB**

Iha loron 14 Marsu 2012, Tribunál Distritál Baucau hala'ó julgamentu lee leitura sentensa ba kazu krime ofensa ba integridade fízika simples ho natureza violénsia doméstika. Kazu ne'e rejista iha tribunál ho número prosesu 157/Crm.S/2011/TDB. Arguidu ba kazu ne'e Julio de Oliveira hasoru nia kónjuje Marília Alves. Kazu ne'e akontese iha loron 19 Setembru 2011 iha Aldeia Marabubu, Suku Trilolo, Sub-Distritu Baucau, Distritu Baucau.

Prosesu julgamentu ba kazu ida ne'e prezidi husi juiz singulár, Dr. António Fonseca, Ministériu Públiku representa husi Dra. Benvinda da Costa do Rosário no arguidu hetan defeza husi Dr. Gregorio de Lima husi eskritóriu Defensória Públiku.

Bázeia ba faktus ne'ebé produs iha prosesu julgamentu, tribunál konvensidu katak arguidu provadu komete krime ofensas ba integridade fízika simples ho natureza krime violénsia doméstika. Relasiona ho hahalok arguidu ne'e, tribunál konklui katak arguidu kontra artigu 145.1 Kódigu Penál konjugadu ho artigu 2.2 letra (a) Lei Kontra Violénsia Doméstika.

Depoide tribunál halo avaliasaun ba faktus no situasaun hot-hotu, tribunál konklui hodi hamonu pena abstrata fulan ne'en (6) prizaun, maibé suspende ba tinan 1.

#### **7. Kazu krime Maus tratus ba kónjuje Nú. 72/Crm.C/2011/TDB**

Iha loron 15 Marsu 2012, Tribunál Distritál Baucau hala'ó julgamentu lee leitura akordaun ba kazu krime maus tratus ba kónjuje. Kazu ne'e rejistu iha tribunál ho Nú. 72/Crm.C/2011/TDB. Kazu ne'e involve husi kondenadu Jacob Moreira Ximenes hasoru nia kónjuje Pascuala Ximenes. Kazu ne'e akontese iha loron 02 Marsu 2011, iha Aldeia Lebenei, Suku Letemumo, Sub Distritu Quelecai, Distritu Baucau.

Prosesu julgamentu lee leitura akordaun ne'e prezidi husi representante juízes koletivu, Dra. Angela Faria Belo, Ministériu Públiku representa husi Dra. Benvinda da Costa do Rosário no arguidu hetan defeza husi Dr. Marçal Ximenes Guterres husi advogadu privadu Eskritoriu ECM.

Bázeia ba rezultadu julgamentu iha loron 13 Feveireiru no 27 Feveireiru 2012, tribunál konvensidu katak arguidu provadu komete krime maus tratus ba kónjuje bázeia ba artigu 154

Kódigu Penál. Relasiona ho hahalok arguidu ne'e tribunál konklui hodi hamonu pena abstratu tinan tolu (3) prizaun, maibé suspende ba tinan tolu (3).<sup>1</sup>

### **8. Kazu krime ofensa ba integridade fízika simples Nú. 13/Crm.S/2012/TDB**

Iha loron 15 Marsu 2012 Tribunál Distritál Baucau kontinua hala'ó julgamentu lee leitura sentensa ba kazu krime ofensa ba integridade fízika simples ho natureza violénsia doméstika. Kazu ne'e rejistu ho número prosesu:13/Crm.S/1012/TDB. Kazu ne'e involve husi kondenadu Manuel Guterres hasoru nia kónjuje Domingas Guterres. Kazu refere akontese iha loron 23 Agustus 2011, iha Suku Uailaha, Sub-Distritu Venilale, Distritu Baucau.

Prosesu julgamentu lee leitura sentensa ne'e prezide husi juiz singulár Dr. António Fonseca, Ministériu Públiku reprezenta husi Dra. Benvinda da Costa do Rosário no arguidu hetan defeza husi Dr. Gregorio de Lima husi eskritóriu Defensória Públiku.

Bázeia ba prosesu produsaun ba provas tribunál konvensidu katak arguidu provadu baka vítima ho katana iha nia matan fukun, maibé tanbá vítima defende a'an ho liman, nun'é rejulta vítima nia liman fuan parte karuk hetan no matan fukun hetan kanek. Hahalok arguidu ne'e kontra artigu: 145 Kódigu Penál kónjugadu ho artigu: 2.2 letra (a) Lei Kontra Violénsia Doméstika.

Relasiona ho faktus provadus hirak iha leten, tribunál konklui hodi hamonu pena abstratu fulan ne'en (6) prizaun ba arguidu, maibé suspende ba tinan ida (1).

### **9. Kazu krime ofensa ba integridade fízika simples Nú. 139/Crm.C/2010/TDB.**

Iha loron 15 Marsu 2012. Tribunál Distritál Baucau la konsege realiza julgamentu ba kazu krime ofensa ba integridade fízika simples ho número prosesu 139/Crm.C/2010/TDB. Kazu ida ne'e involve husi arguida ho inisiál MdS hasoru vítima ho inisiál LS. Kazu ne'e akontese iha loron 08 Maiu 2009, iha Mercado Baru Laspaloos.

Bázeia ba informasaun ne'ebé JSMP hetan husi ofisial justisa tribunál refere katak prosesu julgamentu la konsege realiza, tanbá parte interesadu sira la kumpri notifikasaun. Juiz titulár, Dr. António Fonseca deside adia julgamentu ba loron 26 Abril 2012, tuku 10:00 dadersan.

### **10. Kazu krime abuzu seksuál Nú. 103/Crm.C/2010/TDB**

Tuir agenda Tribunál Distritál Baucau iha loron 19 Marsu 2012 hala'ó julgamentu ba kazu krime abuzu seksuál ne'ebé rejista ho número prosesu:103/Crm.C/2010/TDB. Kazu ne'e involve husi arguidu ho inisiál HM hasoru vítima ho inisiál ACM arguidu nia *oan entiadu (anak tiri)*. Kazu

---

<sup>1</sup> Favor hare Komunikasua Imprensa JSMP: dia 30 Marsu 2012 konaba Tribunál hamonu pena suspensaun tinan tolu ba arguidu kazu krime maus tratus ba kónjuje iha website JSMP: [www.jsmp.minhub.org](http://www.jsmp.minhub.org);

ne'e akontese iha loron 06 Juñu 2008 iha Suku Buruma, Sub-Distritu Baucau Distritu Baucau. Maibé julgamentu ba kazu refere la konsege hala'ó tanbá tribunál la prienxe juizes koletivu.

Tribunál atraves husi juiza Dra. Ângela F. Belo adia julgamentu ba data 07 Maiu 2012 tuku 14 : 30 lorokraik.

### **11. Kazu krime omisídiu negligente Nú.144/Crm.S/2011/TDB**

Iha loron 20 Marsu 2012 Tribunál Distritál Baucau hala'ó julgamentu lee leitura sentensa ba kazu krime omisídiu negligente ne'ebé rejista ho número prosesu 144/Crm.S/TDB. Kazu ne'e involve arguidu Luis Pinto hasoru vítima ho naran Octavio Siko (matebian). Kazu ne'e akontese iha loron 07 Abril 2011, iha Areia Kaiwati, Sub-Distritu Ossu, Distritu Viqueque.

Prosesu julgamentu lee leitura sentensa ne'e prezidi husi juiz singulár Dr. António Fonseca, Ministériu Públiku representa husi Dr. Pascasio de Rosa Alves no arguidu hetan defeza husi Dr. Gregorio de Lima husi Eskritóriu Defensór Públiku.

Tribunál Distritál Baucau absolve arguidu husi nia kazu, tanbá tribunál bázeia ba faktus ne'ebé produs durante julgamentu no mós depoimentu husi testamuña sira. Tuir testamuña José Sico Elu katak tribunál notifiak atu presta nia depoimentu iha julgamentu anterior haktuir katak katak iha momentu ne'ebá wainhira kareta atu se'e ba iha dalan suvidas iha areia Kaiwati Sub-Distritu Ossu, arguidu ne'eb'e nu'udar kondutor aviza oan pasajeros hotu atu tun husi kareta laran, tanbá kondisaun iklima udan boot no abu-abu taka rai metin. Maibé pasajeros sira hotu lakohi tun. Wainhira katera sae ba iha dalan suvidas refere kareta monu tama ba iha kuak bo'ot ida, tanbá arguidu la hare dalan ho mós no iha monetu ne'e kedas kareta forsa laiha no hakiduk ba fali kotu no baku-fila hodi hanehan vítima nia isin lolon no hamate vítima.

### **12. Kazu krime tentativa omisídiu Nú. 80/Crm.C/2009/TDB**

Iha loron 20 Marsu 2012, Tribunál Distritál Baucau la konsege realiza julgamentu ba kazu krime tentativa omisídiu ne'ebé rejistu ho número prosesu 80/Crm.C/2009/TDB. Kazu ne'e involve arguida ho inisiál TG hasoru vítima ho inisiál ABdC. Kazu ne'e akontese iha loron 21 Marsu 2009, iha Suku Bahú, Vila Antigu Baucau.

Bázeia ba informasaun ne'ebé JSMP hetan husi ofisial de justisa katak julgamentu ba kazu refere la konsege realiza, tanbá arguidu ne'ebé notifikadu la kompri notifikasaun. Loron adiamentu, JSMP seidaun hetan informasaun klaru..

### **13. Kazu krime tentativa omisídiu Nú. 152/Crm.C/2011/TDB**

Iha loron 21 Marsu 2012 Tribunál Distritál Baucau hala'ó julgamentu ba kazu krime tentativa omisídiu ne'ebé rejista ho número prosesu 152/Crm.C/2011/TDB. Kazu refere involve husi arguidu ho inisiál MX hasoru vítima ho inisiál TS. Kazu ne'e akontese iha loron 10 Abril 2011, iha areia Kaidavalari Aldeia Abere, Suku Luro, Sub-Distritu Luro, Distritu Lautem.

Prosesu julgamentu hala'ó ho kompozisaun juizes kolektivu ne'ebé kompostu husi Dr. António Fonseca, Dr. Afonso Carmona no Dr. José Gonsalves, Ministériu Públiku representa husi Dr. Aderito Tilman no arguidu hetan defeza husi Dr. Gregorio de Lima husi eskritóriu defensór Públiku.

Audiénsia julgamentu hahú ho lee akuzasaun husi Ministériu Públiku. Iha akuzasaun refere haktuir katak iha loron 10 Abril 2011, mais ou menus iha tuku 06: 00 dadersan arguidu ta'a vítima nia ulun dala rua, ta'a mós iha vítima nia kotuk laran dala ida no liman fuan rua parte loos dala ida. Konsekuensia husi arguidu nia hahalok ne'e halo vítima sofre kanek bo'ot rua iha ulun, kotuk laran no liman fuan rua tohar. Agora dadaun vítima nia kondisaun hanesan ema alezadu.

Kazu ne'e akontese ho motivu , tanbá vítima hamutuk ho nia maun ba ta'a au iha arguidu nia plantasan laho koñesementu husi arguidu.

Iha prosesu julgamentu ne'e arguidu konfesa faktus hotu no arepende ba nia hahalok. Tanbá arguidu konfesa, tribunál bázeia ba artigu: 268, alinea 4 Kódigu Prósesu Penál la persiza tan rona deklarasaun husi vítima. Relasion ho provizaun prosesual ne'e, nune'é tribunál husu atu kontinua ho alegasaun finál. Iha alegasaun finál Ministériu Públiku husu ba tribunál atu fo kastigu ba arguidu tuir hahalok ne'ebé nia komete.

Iha parte seluk, iha defeza nia alegasaun husu ba tribunál atu fo pena ne'ebé kmaan ba nia kliente, tanbá arguidu konfesa, arepende no arguidu mós hanesan xefe família no responsabiliza ba oan na'in rua.

Leitura sentensa sei hala'ó iha loron 28 Marsu 2012 oras tuku 14: 00 lorokraik.

#### **14. Kazu krime ofensa ba integridade fízika simples Nú. 20/Crm.S/2011/TDB**

Iha loron 21 Marsu 2012 Tribunál Distritál Baucau hala'ó prosesu julgamentu ba kazu krime ofensa ba integridade fízika simples ho natureza violénsia doméstika. Kazu ne'e rejistu ho número prosesu 20/Crm.S/2011/TDB. Arguidu ba kazu ne'e ho inisiál TFA hasoru nia kónjuje ho inisiál CMF, ne'ebé akontese iha loron 24 Agustus 2010, iha Aldeia Lutumutu, Suku Trilolo, Sub-Distritu Baucau, Distritu Baucau.

Prosesu julgamentu prezidi husi juiz singulár Dr. António Fonseca, Ministériu Públiku representa husi Dra. Benvinda da Costa do Rosário no arguidu hetan defeza husi Dr. Gregorio de Lima husi eskritóriu Defensór Públiku.

Audiénsia julgamentu hahu ho lee akuzasaun Ministériu Públiku. Iha akuzasaun ne'e haktuir katak iha loron 24 Agostu 2010 maiz ou menus iha tuku 06:00 dadersan iha Aldeia Lutumutu, arguidu buti vítima nia kakorok, rasta vítima nia fu'uk hodi baku ba perede. Aliende ne'e arguidu foti tan ai-dona baku dala ida iha vítima nia ulun no dala lima iha vítima nia ain.

Konsekuensia husi arguidu nia hahalok ne'e rezulta vítima hetan kanek iha ulun, bubu iha kakorok no prejudiak vítima nia saúde fíziku em-jeral.

Kazu ne'e akontese tanbá tanbá arguidu deskonfia vítima fo osan ba mane seluk no subar mane iha uma laran.

Iha julgamentu ne'e arguidu uza nia direitu nonok. Iha parte seluk, vítima deklara katak akuzasaun husi Ministériu Públiku loos hotu. Testamuña ba kazu ida ne'e uja direitu hodi la fo depoimentu tanbá hanesan arguidu nia banin.

Tanbá arguidu no testamuña uza sira nia direitu atu la fo deklarasaun maka Ministériu Públiku husu ba tribunál atu notifika testamuña seluk atu fo depoimentu iha tribunál.

Prosesu julgamentu sei kontinua ba iha loron 19 Abril 2012, ho agenda rona testamuña seluk.

### **15. Kazu krime ofensa ba integridade fízika simples Nú. 09/Crm.S/2011/TDB**

Iha loron 22 Marsu 2012 trinunál Distritál Baucau hala'ó audiénsia julgamentu ba kazu krime ofensa ba integridade fízika simples ne'ebé rejistu ho número prosesu 09/Crm.S/2011/TDB. Kazu ne'e involve husi arguidu ho inisiál AdS hasoru vítima ho inisiál AXS, ne'ebé akontese iha loron 03 Outobru 2010, iha Aldeia Lulibau, Suku Uai-Oli Sub-Distritu Venilale, Distritu Baucau.

Prosesu julgamentu prejide husi juiz singulár Dr. António Fonseca, Ministériu Públiku representa husi Dr. Aderito Tilman no arguidu hetan defeza husi Dr. Gregorio de Lima husi eskritóriu Defensór Públiku.

Audiénsia julgamentu hahu ho lee akuzasaun husi Ministériu Públiku. Iha akuzasaun haktuir katak iha loron 03 Outobru 2010, iha Aldeia Lulibau arguidu hakuak vítima riba ba iha baleta kuak. Konsekuensia husi arguidu nia hahalok ne'e halo vítima sofre kanek iha ain tur no ain kabun parte loos. Tuir akuzasaun Ministériu Públiku katak kazu ne'e akontese tanbá problema fetosan-umane.

Iha julgamentu ne'e arguidu konfesa katak faktus sira ne'ebé Ministériu Públiku akuza ba nia ne'e loos hotu. Tanbá arguidu konfesa faktus hotu tribunál kontinua ba iha alegasaun finál, no tribunál decide atu la rona tan deklarasaun husi vítima no depoimentu husi testamuña bázeia ba artigu: 268 alinea 4 Kódigu Prósesu Penál (KPP).

Iha alegasaun finál, Ministériu Públiku nian, husu ba tribunál atu fo kastigu ba arguidu tuir nia hahalok ne'ebé nia halo ba vítima. Iha parte seluk defeza husu ba tribunál atu fo pena suspensaun tanbá arguidu konfesa faktus no arepende nia hahalok.

Dezisaun finál hala'ó iha loron 27 Marsu 2012, tuku 14:00 lorokraik.



Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883 / 7295795